


# কালের কণ্ঠ

আপডেট : ১৫ মার্চ, ২০১৮ ০২:০৬

বন্দরে মাদরাসার ৩০ শিক্ষার্থীকে জুতাপেটা

## সভাপতি ও শিক্ষকের শাস্তি দাবিতে বিক্ষোভ

 সভাপতি ও শিক্ষকের শাস্তি দাবিতে বিক্ষোভ

নারায়ণগঞ্জের বন্দরে মুছাপুর দারুসুন্নাহ দাখিল মাদরাসার ৩০ শিক্ষার্থীকে জুতাপেটা করার ঘটনায় ক্লাস বর্জন করে বিক্ষোভ করেছে শিক্ষার্থীরা। গতকাল বুধবার সকাল থেকে দুপুর পর্যন্ত বিক্ষোভকালে শিক্ষার্থীরা মাদরাসার অভিযুক্ত সভাপতি শাহাদৎ হোসেন ও আরবি শিক্ষক আব্দুস সালামের অপসারণসহ দৃষ্টান্তমূলক শাস্তির দাবি করে। পরে তারা থানায় গিয়ে অভিযোগ দেয়।

শিক্ষার্থীরা জানায়, গত বৃহস্পতিবার দশম শ্রেণির ছাত্র সাজ্জাদ পাঞ্জাবির সঙ্গে প্যান্ট পরে মাদরাসায় আসায় আরবি শিক্ষক আব্দুস সালাম তাকে মারধর করেন। এ ঘটনায় ছাত্ররা প্রতিবাদ করায় গত মঙ্গলবার বিকেলে ম্যানেজিং কমিটির সভা চলাকালে বিনা এজেন্ডায় সালাম মাস্টার বিষয়টি উত্থাপন করেন। এতে মাদরাসা ম্যানেজিং কমিটির সভাপতি শাহাদৎ হোসেন দশম শ্রেণির ৩০ ছাত্রকে প্রকাশ্যে মাঠে দাঁড় করিয়ে জুতাপেটা করেন। এ ঘটনার পর সভাপতি আর মাদরাসায় আসেননি।

তবে মাদরাসার প্রিন্সিপাল মাওলানা মহিউদ্দিন জানান, ছাত্ররা উচ্ছৃঙ্খল আচরণ, নারী শিক্ষকের সঙ্গে অশোভন আচরণ ও খারাপ মন্তব্য করায় সভাপতি কয়েকজন ছাত্রকে জুতাপেটা করেছেন। আব্দুস সালাম বলেন, ‘ছাত্ররা শিক্ষিকার সাথে বাজে আচরণ করায় সংশ্লিষ্ট কয়েকজনকে ম্যানেজিং কমিটির সামনে হাজির করা হয়। সেখানে ঘটনার সত্যতা পাওয়া গেলে তাদের শাস্তি দেওয়া হয়।’

বন্দর উপজেলা মাধ্যমিক শিক্ষা কর্মকর্তা আ ক ম নুরুল আমিন বলেন, ‘শিক্ষার্থীরা অন্যায় করলে তাদের অভিভাবকদের ডেকে এনে বিচার দিতে পারত। শিক্ষার্থীদের জুতাপেটা শাসন নয়, এটা অপরাধ। এ ব্যাপারে ব্যবস্থা নেওয়া হবে।’

মুছাপুর ইউনিয়ন পরিষদের (ইউপি) চেয়ারম্যান মাকসুদ হোসেন বলেন, ‘আমরা এ বিষয়ে অভিভাবক ও গণ্যমান্য ব্যক্তিদের নিয়ে সুষুম বিচার করে দেব—এই আশ্বাসে শিক্ষার্থীরা শান্ত হয়েছে। এখন আর বিশৃঙ্খলা নেই মাদরাসায়।’ বন্দর থানার ওসি শাহীন মণ্ডল বলেন, ‘ইউপি চেয়ারম্যান সমাধানের দায়িত্ব নিয়েছেন। সমাধান না হলে আইনি ব্যবস্থা নেওয়া হবে।’

Print

সম্পাদক : ইমদাদুল হক মিলন,

নির্বাহী সম্পাদক : মোস্তফা কামাল,

ইস্ট ওয়েস্ট মিডিয়া গ্রুপ লিমিটেডের পক্ষে ময়নাল হোসেন চৌধুরী কর্তৃক প্লট-৩৭১/এ, ব্লক-ডি, বসুন্ধরা, বারিধারা থেকে প্রকাশিত এবং প্লট-সি/৫২, ব্লক-কে, বসুন্ধরা, খিলক্ষেত, বাড়ড়া, ঢাকা-১২২৯ থেকে মুদ্রিত।

বার্তা ও সম্পাদকীয় বিভাগ : বসুন্ধরা আবাসিক এলাকা, প্লট-৩৭১/এ, ব্লক-ডি, বারিধারা, ঢাকা-১২২৯। পিএবিএক্স : ০২৮৪০২৩৭২-৭৫, ফ্যাক্স : ৮৪০২৩৬৮-৯, বিজ্ঞাপন ফোন : ৮১৫৮০১২, ৮৪০২০৪৮, বিজ্ঞাপন ফ্যাক্স : ৮১৫৮৮৬২, ৮৪০২০৪৭। E-mail : info@kalerkantho.com